

Appat Qeqqata kommuniata avannamut killeqarfianiit Qaanaap aqutsiveqarfiata avannamut killeqarfianut kiisalu Tunumi piniarneqartarnerisa 15. augustimiit 28./29. februarimut sivitsorneqarnissaanut Timmissat illersorneqarnerat piniagaanerallu pillugit nalunaarut nr. 8, 2. marts 2009-meersup Inatsisartut 2013-imi ataatsimiinginnerini allangortinneqarnissaannut Naalakkersuisut sulissuteqarnissaannut Inatsisartut aalajangiiffisassaatusiunnersuut.

(Inatsisartuni ilaasortat Knud Kristiansen aamma Siverth K. Heilmann, Atassut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Inatsisartuni ilaasortat Knud Kristiansen aamma Siverth K. Heilmann aalajangiiffisassatusiunnersuumminni allapput, appat Qeqqata kommuniata avannamut killeqarfianiit Qaanaap aqutsiveqarfiata avannamut killeqarfianut kiisalu Tunumi piniarneqartarnerisa 15. augustimiit aallartittariaqartoq, tunngavilersuutigalugu appat mannilioreerlutillu tukertitserersimassamata.

Siunnersuut akuerineqarumaartoq neriutigineqarpoq inuutissarsiutigalugu piniartunut aningaasarsiornikkut iluaquserneqarsinnaammat aamma nunatta nammineerluni pissarititaanik pilersorsinnaanitta annertusarneqassammat.

Siunnersuuteqarnermi uparuarneqarpoq, sumiiffinni taaneqartuni maannakkut appat 1. septemberimiit 28./29. februarimut piniaqqusaammata.

Tamanna ukiakkut ukiukkullu piniarnermut tunngatillugu eqqorpoq, timmissanik ukuninnga Appa, Appa sigguttoq, Miteq siorartooq aamma Miteq siorakitsoq ullormut piniarnermi appat 30-it angullugit inuutissarsiutigalugu piniartut pisisinnaavaat sunngiffimmilu pinialuttartut 5-it angullugit ullormut pisaqarsinnaatitaallutik.

Tamatuma saniatigut Ittoqqortoormiit aqutsiveqarfiani upernaakkut piniarneq pisarpoq 1. martsimiit 31. majip tungaanut Qaanaallu aqutsiveqarfiani 1. martsimiit 15. juni ilanngullugu. Upernaakkut piniarnermi timmissat killilersukkanik ukuninnga Appat, Appa sigguttoq, Miteq siorartooq aamma Miteq siorakitsoq ullormut piniarnermi annerpaamik timmissat 5-it pisarineqarsinnaatitaapput.

Pinngortitaleriffimmit aamma NNPAN-imit tusarniaanermi akissutini taaneqartutuut nunatsinni appaqassutsit ajoraluartumik nalinginnaasumik pitsaanngitsumik inissisimapput nunarput tamakkerlugu appaqassutsit minnerulerallutuinnaarlutik. Aammattaaq maannakkut piffissat timmiarniarfiusut aamma pisassiissutaasut atuutilersimapput timmissat pillugit suleqatigiissitami sinniisuutitanit tamanit isumaqataaffigineqarlutik suleqatigiissitaq ukuninnga sinniisuutitaqarluni KANUKOKA, taamanikkut Avatangiisinut Pinngortitamullu Pisortaqarfik, taamanikkut Aalisarnermut, Piniarnermut Nunalerinermullu Pisortaqarfik, KNAPK, Tapertaralugu Pinialuttartut Aalisartartullu Kattuffiat, Avataq, Timmiaq aamma

Pinngortitaleriffik. Aalajangersaanermi timmissat avannarpasissumi aamma Tunumut ukiup ingerlanerani kingusissukkut piaqqiorfinnut takkuttarnerat sianigineqarsimavoq.

Augustip qiteqqunneranili piniarneq aallartittalissappat tamanna pitsaanngitsumik kinguneqassaaq, timmissat piaqqiortut piniarneqalissapput, tamannami Pinngortitaleriffimmiit aamma Danmarkimi Avatangiisit pillugit Misissuisoqarfimmit misissuinerit naapertorlugit appaqarfinni peqassutsit amerlassusaasa ineriartornerinut immikkut pingaaruteqartorujus-suuvoq.

Ilanngullugu sianigeqquneqarpoq Appat mianernartuummata. Timmissat siusinnerpaamik ukioq uumaffigisaasa tallimassaanni piaqqiulersarput, ukiumut ataatsimik manniliortarlutik, ullut 20-it ivasarput, innamilu manniliorfiusumi piaqqat allisartarlutik sulii ulluni 20-ni, kiisalu timmissat inersimasut (angutiviaq piaraq ilagalugu) isaneq pissutigalugu tingisinaanatik.

Tamanna tunngavigalugu ukiakkut siusinnerusukkut piniarneq aallartitalerneratigut qularutissaanngilaq Appat piaqqiorneri aamma isanerinut pissuseqatigiinnerinut annertuumik sunniuteqassaaq aamma Nunatsinni appaqassutsimut malunnarluartumik sulii ajornerulersitsilluni.

Naalakkersuisullu isumaqarput Appat piniagaaffiata sivitsorneqarnissaa uumassusilinnik pisuussutinik piujuartitsinermik tunngaveqartumik atuinissamut kissaateqarnermut akerliusoq timmissamullu pineqartumut peqassutsikkut inissisimaneranut ajornerulersitsissasoq.

Taamaattumik Naalakkersuisut aamma isumaqarput inuutissarsiutigalugu piniartunut annertunerusumik isertitaqarnerulersinnaaneq ukiuni tulleriinni ikittuinnarni pissasoq, peqqutigalugu appaqassutsit malunnarluartumik annikillissammata. Taamaalillunilu timmissanik imarmiunik sulii nammineeerluni pilersortuaannarsinnaaneq ajorseriassalluni, maannakkumut killilersuinermit naleqqiullugu.

Qulaani pissutsit taaneqartut pissutigalugit Naalakkersuisut siunnersuut tapersersorsinnaanngilaat.

Matumuuna siunnersuut Inatsisartunut suliareqqitassanngorlugu ingerlateqqippara.